



Hardanger Energi AS

Saksbehandlar, innvalstelefon

Magnus Johan Steinsvåg, 5557 2325

Svar på søknad om bygging av bru over Jondalselvi og inn i Gulbergnotten naturreservat

Statsforvaltaren gjev Hardanger Energi AS løyve til å føra opp ei gangbru over Jondalselvi og inn i Gulbergnotten naturreservat. Løyvet gjeld også nødvendig fjerning av små tre og buskar for etablering av brua. Løyvet er heimla i naturmangfaldlova § 48 og det er knytt vilkår til vedtaket.

Vi viser til søknad om å få byggje gangbru over Jondalselva og inn i Gulbergnotten naturreservat dagsett 21. februar 2024.

Det vert søkt om dispensasjon frå verneforskrifta for å bygge ei bru over Jondalselvi like nedanfor Vikeholmane mellom Byrkjelandsvatnet og Jondal sentrum. På nordsida av elva vil fundamentet til brua kome innafor verneområdet, då vernegrensa går i elvekanten på nordsida. Bruforbindelsen vil lede inn til ein gamal sti som går langs elva.

Det er Hardanger Energi AS som søker om dispensasjon og som i tillegg er tiltakshavar. Når brua er bygd, vert det opplyst at eigarskap og vedlikehaldsansvar vert overført til Jondal jakt og fiskelag. Det er Ullensvang kommune som er grunneigar. Statsforvaltaren som forvaltingsansvarleg for naturreservat har såleis ikkje noko eigarskap – eller vedlikehaldsansvar til brua.

Bakgrunnen for ønskje om å setje opp denne brua, er at ei eldre hengebru vart reve då Hardanger Energi AS demma opp elva ved Vikeholmane. For å oppretthalde tilkomsten til nordsida av elva, vart det avtalt med Jondal jakt og fiskelag at ein ny bru skulle erstatte den gamle. Brua vil gje tilgang til areal som tidlegare har blitt nytta til utmarksbeite og hausting av husdyrfor. I dag vert området i størst grad nytta til jakt, men vil også generelt letta åtkomsten til området.

Lovgrunnlaget

Verneforskrifta for Gulbergnotten naturreservat § 3 a seier at «*vegetasjonen, medrekna daude buskar og tre, er verna mot skade og øydelegging*». Vidare § 3 c at «*det ikkje må setjast i verk tiltak som kan endre naturmiljøet, som til dømes oppføring av bygningar, anlegg, gjerde og andre varige eller mellombelse innretningar*».



Naturmangfaldlova § 48 opnar for at forvaltingsstyresmakta kan gje dispensasjon frå verneforskrifta under visse vilkår.

Tiltaket

Søklar skriv at brupunktet ligg om lag 1,5 km frå Jondal sentrum langs Folgefonnvegen og om lag 70 meter nedafor demningen. Staden for bru er valgt ut i frå moglegheit for å kome til staden, lengda på bruspennet og kor gode moglegheiter det er der for å plassere fundament.



Utforming av tiltaket slik det går fram i søknaden av 21. februar 2024.

Sjølve konstruksjonen vil vere ei trebru på om lag 17-18 meter og med ei breidd på om lag 1 meter. med bjelkekonstruksjon. Det skal nyttast kjerneved av furu som trevrirke. På sørsida, utafor reservatet vil fundamentet bli 2-3 meter høgt og bestå av betong. På nordsida, like på innsida av reservatet, vert det plassert eit mindre brukar på ei framskoten fjellformasjon. Fundamentet vert støypt i betong med om lag mål 120 x 50 x 50 cm, tilpassa høgda av fundamentet på sørsida.

Det kan vere behov for fjerna noko vegetasjon som små tre og buskar. Brupunktet ligg like ved Folgefonnvegen som gjer at brukonstruksjonen kan bli heist på plass ved hjelp av kranbil.

Statsforvaltaren si vurdering

I samband med arbeidet med frivillig skogvern med utviding av Gulbergnotten naturreservat, har vi blitt oppmerksom på at det kunne vere aktuelt å byggje ny bru over Jordalselvi.

Ved denne utvidinga av naturreservatet 16. desember 2022, kom vernegrensa heilt ned til nordkanten av Jordalselvi.

Føremålet med vern av Gulbergnotten går fram i verneforskrifta § 1:

Føremålet med forskrifta er å ta vare på eit område som representerer ein bestemt type natur i form av eit oseanisk prega skogområde, og som har særleg betydning for biologisk mangfald ved at det har fleire natur- og vegetasjonstypar, edellauvskog, furuskog og lite påverka skog utan synlege inngrep. Det er eit mål å ta vare på verneverdiane i best mogleg tilstand, og at mangfaldet av artar og livsmiljøa deira skal få utvikle seg mest mogleg naturleg».



Som omtalt i avsnittet ovanfor, vil inngrepet med delar av brua og tilhøyrande brufeste kome om lag 3-4 meter inn i verneområdet. Brufestet på 120 x 50 cm vil vere etablert på berget, og det vil vere ein liten rampe ned frå brua til stien. Lokalisering av tiltaket kjem godt fram i bilete som ligg i søknaden. Det vil i tillegg måtta rydda bort eit fåtal mindre tre og buskar.

Tiltaket vil gå inn i registrert naturtypelokalitet rik edellauvskog naturbase id BN00083689 som er vurdert til regional verdi. Lokaliteten vart registrert i 2011 av Biofokus under oppdrag i å registrere rike lauvskogar av Miljødirektoratet (då Direktoratet for naturforvaltning). Det er registrert raudlistearten raud stuvlav (VU) på styva ask om lag 150 aust for tiltaket. Vidare er treslaga alm og ask no lista som sterkt trua, men ingen av desse treslag vil bli råka av tiltaket, jf naturmangfaldlova [§ 8](#). Naturtypelokaliteten er på om lag 80 dekar, medan tiltaket inkludert rampe til brua neppe vil legge beslag av meir areal enn 3-4 kvadratmeter. Ved løfting av brua som planlagt med kranbil er konsekvensar på natur også under gjennomføringa redusert og såleis i tråd med naturmangfaldlova [§ 12](#). Datagrunnlag etter søk i naturbase og Artskart er henta ut 16. april 2024.

Med etablering av bru her vil nok det føre til meir ferdsle i denne delen av reservatet, men på generelt grunnlag vurderer vi den aktiviteten som akseptabel ut frå dei kjente naturverdiane i området jf naturmangfaldlova [§ 10](#). Vi reknar heller ikkje med at løyve til tiltaket vil gje særleg presedens i liknande saker, då dette tiltaket har ein spesiell historikk og bakgrunn.

Oppsummert vurderer vi derfor tiltaket til å ikkje vere i strid med verneføremålet eller vil påverka verneverdiane nemneverdig.

I kva grad det trengs løyve etter plan og bygningslova må avklarast med Ullensvang kommune som er lokal planstyresmakt. Med bakgrunn i at noko av brua har fundament nede elvekanten, må også tiltakshavar avklare tiltaket med NVE før igangsetting.

Vedtak

Statsforvaltaren i Vestland gjev Hardanger Energi AS løyve til å føra opp gangbru over Jordalselvi og inn i Gulbergnotten naturreservat jf verneforskrifta § 3c. Løyvet gjeld også nødvendig fjerning av eit fåtal mindre tre og buskar for gjennomføring av tiltaket jf verneforskriftas § 3a. Lokalisering og utforming av brua skal følgje søknaden og vedlegg til dette løyvet. Løyvet er heimla i naturmangfaldlova § 48 og gjeld i 3 år frå i dag.

Vilkår

1. Tiltaket må avklarast med Ullensvang kommune og NVE før igangsetting.
2. Konstruksjonen skal vere i tre, og maksimalt 20 meter lang og 1,20 meter brei.
3. Det skal gjevast melding til Statens naturoppsyn v/ Olaf Bratland når tiltaket er gjennomført.
4. Alt av restar og avfall frå bygginga skal fjernast frå området og leverast til godkjent mottak.

Klage

Vedtaket kan påklagast innan tre veker, jf. forvaltingslova §§ 28 og 29. Ein eventuell klage skal stilast til Miljødirektoratet, men sendast om Statsforvaltaren i Vestland, jf forvaltingslova § 32. Den må vere sendt innan 3 veker etter at klagar er kjend med vedtaket.

Med helsing

Stein Byrkjeland
fagdirektør

Magnus Johan Steinsvåg
seniorrådgjevar


Dokumentet er elektronisk godkjent




Kopi til:

NY STI AS
Ullensvang kommune
Miljødirektoratet
Statens naturoppsyn v/ Olav Bratland
NATURVERNFORBUNDET I HARDANGER

Vedlegg



Brupunktet er markert midt på kartet.



Brupunktet og markering av stien på nordsiden. Oppstrøms vises demningen